

Os medios audiovisuais públicos de Galiza son un **servizo esencial** que ten como misión difundir contidos destinados a garantir a cultura e a lingua galega, a independencia e a veracidade da información, o pluralismo, a cohesión social e territorial, a promoción dos dereitos fundamentais e das liberdades públicas e a calidade da propia democracia.

Eses contidos son representacións simbólicas que afectan á maneira de oír, de ver e, en definitiva, de experimentar o mundo que vivimos, e, polo tanto, requiren dun papel activo da cidadanía á hora de establecer criterios orientadores e de vixiar o cumprimento dos mesmos; isto é, requiren da participación e do control social.

Porén, **o executivo galego mantén SECUESTRADAS a nosa radio e a nosa televisión**. Actuando ao servizo da forza política no goberno, a actual dirección da CRTVG **antepón os intereses do Partido Popular aos valores de carácter ético-político nos que debe fundamentarse o servizo público**, relacionados coas necesidades democráticas, sociais e culturais do noso pobo.

Alfonso Sánchez Izquierdo, designado a dedo hai 13 anos polo noutrora presidente da Xunta, **Alberto Núñez Feijóo**, é expresión dun **modelo de radiotelevisión que non garante a independencia do ente público**. Que reduce a variedade, o equilibrio e a calidade do conxunto de programacións e servizos audiovisuais destinados aos diferentes públicos. Que posibilita a emisión noutras linguas distintas do galego. Que non potencia a participación e o control social. Que dá entrada ao capital privado e deixa nas súas mans boa parte da programación da CRTVG, comprometendo os valores de servizo público antes mencionados.

Neste contexto, as organizacións sociais, culturais, sindicais, políticas e profesionais abaixo asinantes consideramos que **a sociedade galega debe saír ao RESCATE** do noso servizo público de comunicación audiovisual, e expresamos a nosa firme vontade de defender a existencia dunha radiotelevisión pública:

- Que garanta o respecto escrupuloso á **obxectividade, a imparcialidade, a neutralidade, a veracidade e o pluralismo** informativo, erradicando a manipulación e a cancelación de contidos e profesionais.

- Que recupere a perspectiva da **realidade social, laboral, económica e cultural do país** e de todo o seu tecido social, nos contidos informativos, divulgativos, educativos e de entretemento. A tal fin, garantírase o dereito de acceso, segundo criterios obxectivos de representación e implantación social, sen que poida excluírse ningún grupo social e co máximo respecto ao pluralismo e á participación democrática de toda a sociedade galega.

- Que recupere a **cobertura territorial de todo o país e as desconexións locais**, espazos fundamentais para o dereito da cidadanía a acceder ao que acontece na súa contorna máis próxima.

- Que promova e defenda a **identidade de Galiza, da súa lingua e da súa cultura**, co estímulo á produción editorial, teatral, musical, audiovisual e demais expresións artísticas e escénicas do país.

- Que xogue un papel estratéxico na converxencia dixital e garanta a **presenza do galego nas plataformas dixitais**.

- Que fomente a través dos contidos a **igualdade e a non discriminación**, a diversidade sexual, integrando a **perspectiva de xénero** e fomentando accións positivas, así como o uso da linguaxe non sexista.

- Que preste especial atención á **programación dirixida á infancia e á mocidade**, por canto que representan o futuro da sociedade, recuperando unha das principais funcións para a que foi creada a Galega, o fortalecemento da cultura e a lingua propias de Galiza, así como o seu papel educativo, socializador e galegizador.

- Que dispoña da estrutura, dimensión e **recursos materiais, orzamentarios e humanos necesarios** para desenvolver con autonomía as misións de servizo público que ten encomendadas.

- Que cumpra a súa función estratéxica como motor do **desenvolvemento da produción audiovisual** independente, con transparencia e evitando a concentración das compras nun número reducido de provedores.

Por último, instamos aos poderes públicos de Galiza ao cumprimento da normativa do sector audiovisual xestionado pola Xunta pública galega, nomeadamente a **designación do Director Xeral por maioría cualificada do Parlamento galego**; o establecemento dos obxectivos xerais que debe cumprir a CRTVG, a través do correspondente mandato marco; a aprobación do **Estatuto Profesional e o Consello de Informativos**, ou a creación dunha autoridade audiovisual independente que vele polo cumprimento das misións de servizo público encomendadas á CRTVG, conforme aos principios expresados neste manifesto.